



Timmisartuutileqatigiiffik Air Greenland nunatta tamakkiisumik pigisariaqarneranik, imaluunniit nunatta piginneqataassutaasa, 37,5 %-iusut, naalagaaffimmut imaluunniit SAS-imut tunineqarpata, taakku arlaat nunatsinnut imminut akilersinnaanerunersoq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Anthon Frederiksen, Partii Naleraq)

Apeqquteqaat aallaavigalugu oqallinnermut siuliani taaneqartumut Inuit Ataqatigiinniit ima oqaaseqaateqassaagut.

Pineqartoq arlalinnik iseqarluni oqaluuserineqarsinnaagaluartoq taamaattoq suna suliffeqarfimmut, taamalu inuiaqatigiinnut, aningaasatigut iluaqutaanerususaaq aallaavigalugu isumaliutersuutigisatsinnik saqqummiussaqaagut.

Timmisartortitseqatigiiffik Air Greenland Nunatsinnit 37,5%-imik, SAS-mit 37,5%-mik kiisalu danskit naalagaaffiannit 25%-imik piginneqarpoq. Tamatumalu malitsigisaanik iluanaarutaajunnartut tamarmik taama amerlatigisunittaaq agguataarneqartarput.

Air Greenlandip ukiumoortumik nalunaarutaani 2015-imeersumi sinneqartoorutit ilanngaaseriikkat 60 mio. kr.-iupput. Taakku 25%-iinik danskit naalagaaffiata pissarsiguni pissarsinngikkunigilluunniit malugingaarnaviannigikkaa, illuatungaani uagut pissarsiarigaluarutsigit uagutsinnut malunnaatilerujussusaaq. Immaqa 'toqqaannartumik nunatta karsianut nakkartinngikkaluarlugit ilaatigut ingerlatseqatigiiffik piumaffigisinnaavarput billetsinik akikillisaqqullugu imaluunniit atortunik nutaanik atuisunut oqilisaataasussanik pisiortoqqullugu, tassa soorlu assersuutigalugu Tele Greenlandimut piumasaqartarnitsinnut assingusumik iliorsinnaavugut. Aamma qularnanngilaq SAS-ip sinneqartoorutinit pissarsinngikkaluaruni amigaatigerujussuassanngikkai.

Taamaammat niuernerinnarmilluunniit isigalugu Air Greenlandimi piginneqataassutitigut amerlanerussuteqassagutta ingerlatseqatigiiffimmut inuiaqatigiittut iluaqutigissavarput. Kisiannili aamma inuiaqatigiittut pisariaqartitatsinnut naleqqussaannermit isigalugu soorunami nammineq annerpaamik oqartussaaffigisatsinnik timmisartortitseqatigiiffiuteqarnissarput kajungernerpaassaaq.

INUIT ATAQATIGIIT

INATSISARTUNI



SAS ingerlatseqatigiiffittut namminerisaminik soqutigisaqarmat piginneqataassutsiminik iperaaqullugu piumaffigisinnaangilarput. Qularnangilarli danskit naalagaaffiat naalackersuisutsinniit inussiarnersumik oqaloqatigineqarsinnaavoq piginneqataassutit akisuallaanngikkaluamik nunatsinnut nuukkiartuaarneqarnissaannik. Taamaammat oqallinnermut matumunnga ilanngullugu naalackersuisut kajumissaarusuppavut ilumut piginneqataassutsinik tigusiartuaarnissamut periarfissaqarnersoq misissoqqullugu. Nuna namminersortoq aamma namminerisaminik timmisartortitseqatigiiffeqartariaqarpoq!

Kelly Berthelsen